

ProEight intai peluang di AS

KUALA LUMPUR 24 April - ProEight Sdn. Bhd. (ProEight), sedang mengintai pasaran minyak dan gas (O&G) Amerika Syarikat (AS) bagi memasarkan produk-produk inovasi dengan mempercayai Perjanjian Perkongsian Trans-Pasifik (TPPA) akan memudahkan syarikat itu menembusi pasaran kuasa ekonomi dunia itu secara lebih meluas.

Syarikat yang menyertai Program Pembangunan Vendor (EVP) Petrolia Nasional Bhd. (Petronas) itu, merupakan satu daripada tiga syarikat pengeluar pengedap mekanikal untuk industri O&G di peringkat global.

Pengarah Urusan ProEight, Azhar Zainal Abidin berkata, penglibatan Malaysia ke dalam TPPA dilihat sebagai satu transformasi dan berupaya membuka peluang perdagangan yang lebih luas serta perlindungan terhadap pelaburan Malaysia di luar negara.

"TPPA akan mewujudkan akses

utama untuk barangan dan perkhidmatan Malaysia ke beberapa buah negara yang terlibat. Sebagai syarikat yang memiliki teknologi dan kepakaran dalam bidang pembuatan, ProEight melihat TPPA sebagai landasan terbaik dalam usaha untuk menembusi pasaran luar negara dengan lebih efektif.

"Berlandaskan dasar syarikat yang mengutamakan pembangunan dan penyelidikan yang berterusan serta kepakaran dalam menghasilkan produk yang berteknologi dan berinovasi tinggi, TPPA memberi peluang kepada ProEight untuk bersaing di arena antarabangsa, khususnya di AS," katanya kepada *Utusan Malaysia* di sini baru-baru ini.

Pada akhir 2014, ProEight menandatangani memorandum persefahaman (MoU) dengan syarikat kejuruteraan dari Argentina, GPower S. A. dengan cadangan untuk membuka kilang pengeluaran di Buenos Aires, Argentina

dengan pelaburan sekitar AS\$20 juta (RM78 juta) dalam tempoh tiga tahun.

Jelas Azhar, MoU itu dilihat sebagai usaha syarikatnya untuk menempatkan diri dan memecah masuk pasaran O&G di Argentina, seterusnya ke seluruh Amerika Selatan.

Mengulas lanjut, beliau berkata, selain Malaysia dan AS, ProEight juga telah beroperasi di Thailand dan Filipina.

"Dengan mempunyai pengiktirafan daripada Institut Petroleum Amerika (API), sebuah institusi pengurusan bagi Industri O&G, penjenamaan ProEight di peringkat global menjadi lebih mudah dan lebih dipercayai.

"ProEight giat memperluaskan pasaran ke Asia Barat terutamanya pasaran Arab Saudi. ProEight kini sedang berunding dengan dua hingga tiga syarikat di Arab Saudi yang berminat untuk menjalinkan usahasama," katanya.